

Minister Otmar Oduber papiando riba Linear Park

Awor a yega na un punto cu e trabou ta bayendo na un velocidad hopi halto



DIARANSON mainta, minister Otmar Oduber a realiza un site inspection na e construccion di e Linear Park pa asina e mira con e desaroyo di e parke aki ta bayendo.

Hunto cune tabatin personal di DOW cu ta supervisando e trabounan, miembronan di Infrateam y tambe e constructor di e obra.

E mandatario a duna di conoce cu pa e ultimo dos lunanan nan ta bin ta reuniendo tur diaranson riba e proyecto di Linear

Park, mirando cu pa october lo kier tin full e parti di e plaza dilanti Talk of the Town y te na oficina di turismo cla, caminda lo tin espacio pa parkeo.

Teniendo na cuenta e meta aki, a tuma e decision di realiza e site inspection pa mira si e ta alcanzabel y Minister Oduber ta sinti cu mirando con e trabounan ta avanzando, specialmente den e ultimo simannan, cu si lo logre.

Esaki despues cu na inicio di e proyecto a confronta diferente retonan relaciona cu

utilidadnan, manera entre otro trabounan di tuberia, cabelnan di coriente y telecomunicacion.

"Awor a yega na un punto cu e trabou ta bayendo na un velocidad hopi halto, e klinkers cu ta wordo poni, ta mira cu e baki matanan cu ta bira banki ya caba ta poni. Pa loke ta e palo di luznan, riba 270 mata

cu lo wordo poni den e area aki so y luznan decorativo ta yegando den dos pa tres siman.

Esey ta significa cu una bes nan yega den mas o menos un luna nan lo caba di wordo poni y e ora por mira e transformacion cu ta tuma lugar", Minister Otmar Oduber a duna di conoce.